

佛說四天王經

宋沙門釋智嚴共寶雲譯

聞如是一時佛在舍衛國祇樹給孤獨園佛告諸弟子慎汝心念無受六欲湫情去垢無求爲首內以清淨外當盡孝以四等心奉養

孝九

三

所生晨入尊廟稽首悔過朝稟暮誦思經妙義以佛重戒治心穢病齋肅靖處數息禪定反流盡源以求道真壽命猶電恍惚即滅齋日責心慎身守口諸天齋日伺人善惡須彌山上即第二天天帝名因福德巍巍典主四天四天神王即因四鎮王也各理一方常以月八日遣使者下案行天下伺察帝王臣民龍鬼蜎飛蚊行蠕動之類心念口言身行善惡十四日遣太子下十五日四王自下二十三日使者復下二十九日太子復下三十日

四王復自下四王下者日月五星二十八宿其中諸天僉然俱下四王命曰勤伺衆生施行吉凶若於斯日有歸佛歸法歸比丘僧淨心守齋布施貧乏持戒忍辱精進禪定翫經散說開化盲冥孝順二親奉事三尊稽首受法行四等心慈育衆生者具分別之以啓帝釋若多修德精進不怠釋及輔臣三十二人僉然俱喜釋勅伺命增壽益算遣諸善神營護其身隨戒多少若持一戒令五神護之五戒具者令二十五神營衛門戶凶疫衆邪陰謀消滅夜無惡夢縣官盜賊水火災變終而不害穰禍滅怪唯斯四等五戒六齋耳猶如大水而滅小火豈有不滅者乎臨其壽終迎其鬼神上生天上七寶宮殿無願不得若有不濟衆生之命穢濁盜竊婬犯他妻兩舌惡

罵妄言綺語厭禱呪詛嫉妬恚癡逆道不孝
違佛遠法謗比丘僧善惡反論有斯行者四
王以聞帝釋及諸天僉然不悅善神不復營
護之即令日月無光星宿失度風雨違時以
現世人欲其改往修來洗心齋肅首過三尊

孝九

四等養親忠于帝王慈心諫諍至誠無欺反
前修來捐穢濁之操就清淨之道若有改邪
行就正真者帝釋四王靡不歡喜日月即清
明星宿有常風雨順時毒氣消歇天降甘露
地出澤泉水穀滋味食之少病華色弈弈壽
命益長生不更牢獄死得上天天上福德所
願自然飛行存亡項有日光食自消化無有
便利之患身中香潔口氣苾芬今日月星宿
即諸天宮宅也七寶殿堂懸處虛空在意所
之壽終下生侯王之家顏華煒煒見者心歡

逢佛值法賢聖相連力行不與罪會必得泥
洹斯皆五戒十善斂情攝欲六齋使然拘留
秦佛時人壽六萬歲民性無爲護彼猶養已
平等無二彼佛去世正教衰薄民無正行以
漸爲惡其壽日減至于百歲吾善逝後民違
佛教無復孝子司命減算壽日有減天神不
祐凶疫惡鬼日來侵害災怪首尾願與意違
非禍縱橫生罹王法之圖圍死入地獄餓鬼
畜生若出爲人必爲下賤善惡追身猶若五
穀隨其所種獲其果實亦如夜書火滅字存
身死名滅殃福不朽慎護汝心攝身守口五
戒十善可從得道吾今得佛積行所致諸弟
子聞經歡喜作禮而去

孝九

五

佛說四天王經